

Erklärung.

**G**eliebten in Christo dem Herrn /  
Es werden vns im Newen Testament et-  
liche Taufhistorien fürgehalten / daraus  
wir vns allerley Lehr / Trost vnd Erin-  
nerung zu erholen haben: Als die Tauffe  
des Kämmerers vnd Gewaltigen der Königin Candaces in  
Aethiopia / Act. 8. v. 27. der war kommen gen Jerusa-  
lem anzubeten / wie er nun wider heim zog / vnd auff sei-  
nen Wagen sitzt / vnd den Propheten Esaiam liest im 53.  
Capitel / So lest Gott dem Apostel Philippo durch einen  
Engel befehlen / daß er sich auff dieselbe Strasse / die der  
Kämmerer zog / zum Wagen machen solte. Wie er dahin  
kômpt / vnd zu dem Kämmerer auff den Wagen sitzt / So  
fehret er an / vnd erkläret ihm den Propheten / von wem er  
im selbigen Capitel rede / vnd prediget ihm das Evange-  
lium von Jesu / vnd als sie hierauff zu einem Wasser kom-  
men / so steigen sie herab von Wagen / vnd als der Käm-  
merer die Tauffe begeret / vnd bezeuget / daß er glaube / daß  
Jesus Christus Gottes Sohn sey / so tauffet ihn Philip-  
pus da am Wege im Wasser / vnd zog der Kämmerer hier-  
auff seine Strasse frölich.

Item, Act. 10. v. 48. Die Tauffe des Gottseligen  
vnd Gottfürchtigen Hauptmans Cornelij zu Casarien /  
der sahe einmal in einem Gesichte offenbarlich vmb die  
Neundte stunde am Tage einen Engel Gottes zu ihm ein-  
gehen /

Exordium  
ex historiis  
Baptizato-  
rum in No.  
Test.